

經文：提摩太前書 3:1-13

提摩太前、後書 kap 提多書合稱做教牧書信，是三封寫 hō 提摩太 kap 提多 ê 批。內容是教示兩位少年 ê 牧者按怎牧養教會，親像：設立職分、牧養信徒、處理會務等等 ê 問題。教會是信仰 ê 團體，mà 是人才濟濟 ê 所在，各種 ê 專業人才 lóng 有，教會要指導信徒學習按怎發展基督徒 ê 品格，hō 每一 ê 人 lóng ē-tàng 按照伊 ê 專長、角色 kap 使命獻身 tī 社會，koh-khah 有效果來服事上帝。教會需要有組織來完成事工。教會 ài 盡量閃避異端，又教示福音 ê 真理。這本冊 ná 教會手冊，除了教示提摩太牧會 ê 原則以外，koh 有勸勉，是老牧者向心目中親愛 ê kiáⁿ 兒——少年牧者——所發出 ê。

今 á 日是 2006 年 ê 會員大會，tùi 舊年開始，咱 kā 一年兩 pái ê 會員大會減作一 pái，就是六月無 koh 選長執，等候正月開會員大會 chia 改選長執。使徒行傳 6:3、提多書 1:5-9 以及今 á 日 ê 經文 lóng 有論到長執 ê 職責。初代教會 ê 監督工作由長老負責（徒 20:17、28；多 1:5、7），包括管理教會（提前 3:5、5:17 上），教示、牧養（徒 20:28）、懲治信徒（徒 20:28；彼前 5:2），堅守道理（徒 20:28-31、多 1:9），甚至管理財務（徒 11:30），所以有監察 ê 意思。而且是以團隊領導 ê 方式，這是教會體制 ê 雛形。

今 á 日 ê 經文 thang 對幾方面來思考一位稱職 ê 長執應具備 ê 條件。

第二節講：教會領袖應該 tioh 無 thang 嫌，ài 有相當 ê 品格作教示。長執 ê 職份是 tī 建立教會，伊只 ē-tàng 有一 ê 某；作人要嚴肅，生活有規律，無 phah 人，tioh 溫柔，無相爭，無貪財，意思是 ài 會曉節制家己，無受情緒 kap 私慾 ê 控制。會記得幾冬前神召會出名 ê 電視佈道家 Jim Bakker，伊講道真有力，人真愛聽，每冬透過媒體 ê 捐款 tioh 有美金 10 多億，是當時 ê 屬靈領袖之一，tī 伊名聲 siōng 高峰 ê 時，互人告非法斂財 kap 犯姦淫 ê 罪，最後落得身敗名裂。伊 ê 經歷是教會領袖 ê 警惕。

作長執 ê 愛歡喜分享，設使教會是基督 ê 身軀，信徒就是互相作肢體。耶穌 ài 咱接待 tī 患難中 ê 肢體，分擔互相 ê 苦楚 kap 喜樂，這 mà 是耶穌唯一認咱作門徒 ê 記號。論到信徒 kap 金錢 ê 關係，就嘅是單純按怎 thàn 錢、用錢、存款或是奉獻 ê 管理運用問題 nā-tiāⁿ，伊 koh-khah 是一個屬靈 ê 問題：信徒管理錢財？或是互金錢管理？耶穌講：「lín 不能事奉上帝，又事奉金錢。」（路加福音 16:13）意思是咱 bē-sái 嘴講上帝是我 ê 主，卻 kā 家己 ê 一生寄託 tī 金錢頂面。咱 thang 藉 tiòh 聖靈 ê 幫助，對金錢有絕對 ê 控制權，可惜有 kóa 人，親像離開保羅 ê 底馬，互金錢管制，tng 去世間。佇台灣 Bat 發生管理某教派牧師退休金 ê 牧長將所有 ê 錢捲走。Tī 美國 mà 發生過負責 ê 人，將該教派 ê 牧師退休金 thèh 去放高利，尾阿 hong 倒了了。金錢是魔鬼最大的誘惑。作牧長 ê bē-tàng 不謹慎。我 tī Pittsburgh 長老教會 ê 牧師 bat 對我講，伊 M̄-bat 看信徒奉獻 ê 明細，怕會影響對會友 ê 想法，我一直警戒家己 M̄-tàng 干涉教會 ê 財務，奉獻是個人 kap 上帝 ê 關係，不是 beh hō 人檢驗 ê。上帝 kā 錢財交託 hō 咱，咱是伊 ê 管家，ài 有智慧來運用。設使連身外物 ê 錢財，咱佇不會利用，伊怎會 kā koh-khah 大，koh-khah

重 ê 責任交托咱 neh?

Koh 落來是美滿 ê 家庭：東西方 ê 看法類似，中國俗語講：修身、治國、平天下 Kap 聖經 ê 講法相當一致，mà 真實際。上帝起初創造 ê 時爲人類設立家庭，目的是 beh 表彰大家庭—教會 ê 款式。所以作教會 ê 領導者 ê ài 先管理好家己 ê 厝，chia ē-tàng 佇教會內執行規矩。長執 Mà 有可能是一面愛主一面愛世界，tī 教會內表現真熱心疼主，M̄-k oh tī 厝裡就無法度假仙疼主 ah，因爲厝 ê 人尙清楚你 ê 做人，所以 tī 厝內 ài 作家內 ê 模範，是尙好 ê 學習。有一位女長老伊真熱心教會事工 mà 真疼主；真可惜丈夫 m̄ 信主，伊感覺真遺憾。一 pái 禮拜束，伊邀請牧師去 kap 伊 ê 丈夫談道。牧師拜一去訪問伊 ê 先生， tng 來了後，拍電話 kā 伊講：恁先生認爲你 tī 厝內太過鴨霸，伊講設使信基督教是 án-ne, 伊寧可 m̄ 信。Chia-ê 話 hō 伊有真深 ê 反省。M̄-koh 過轉禮拜伊 ê 先生就 kap 伊同齊來教會。牧師問伊按怎做到？伊講：以前我感覺真有能力，丈夫較軟者，養成我成作指揮型 ê 人，總是家庭生活不需要一 ê 指揮官，只要表現疼就好。我有悔改，盡量注意，用溫柔 ê 態度對待丈夫，按呢了後，因爲夫妻關係改善，一對子兒 mà 受感化，後來 mà 來參加主日學，m̄-na 個性變好，連讀書 lóng 真認真。所以信徒生活是起造教會 ê 起點，基督 ê 疼需要落實在生活中 chiah ē-tàng 顯出意義來。

作長執 ê mà 要有好名聲，每一 ê 基督徒 lóng 應該有「透過我活出福音」ê 意識，其中 siōng 重要 ê 因素是呼召 (calling)。確信上帝對咱的呼召會 thang 支持咱贏過真 chē 引誘 ê 陷阱，hō 咱避免無形、有形 ê 犯罪。其實信仰 ê 實踐是知易行難。有時親像耶穌 tī 客西馬尼園向學生講：心神甘願，若是肉體軟 chiahⁿ。(太 26:41)。又親像保羅所講：我所願意 ê 善，我偏 m̄ 去做；我所無願意 ê 惡，我顛倒去做 (羅 7:19)。Tī 咱 ê 一生當中會不斷經歷財富、感情、權勢、名位 ê 誘惑，真不容易去抗拒，拒絕了後 siōng-siōng 有失落 ê 感覺，只要咱靜心祈禱，確定這是上帝 hō 咱 ê 呼召，án-ne 信仰就會肯定你 ê 價值 kap 尊嚴。所以保羅一再提醒咱，因爲外界用特別 ê 眼光來觀察基督徒，咱 Koh-khah 愛有好 ê 表現。目的是 beh hō 外人，找無咱 ê 不對，無話 thang 講。(提 2:8) 所以好見證是傳福音 siōng 好 ê 器具，這就是保羅所講 ê 好名聲。

加爾文論到教會 kap 事奉 (Church and Ministry) ê 時，強調教會教示 ê 職責是規矩 (Discipline) kap 關心散赤人。規矩就是生活有節制，咱信主了後，若性情、個性猶原受到家己 ê 軟弱 kap 私慾 ê 限制，án-ne 按怎 ē-tàng 用基督 ê 心來管理教會 neh? 關心散赤人就是耶穌基督所講 ê 要疼人親像胛己，要善用上帝賜 hō 咱 ê 才能 kap 金錢來疼你 ê 厝邊。所以長執 ê 責任就是起造教會，保守伊是合上帝心意 ê 教會。這實在是無簡單，成做教會 ê 領袖，m̄ 是單單靠意願或是熱誠，是實在要結出生命 kap 生活 ê 果子，án-ne chiah ē-tàng hō 主歡喜。尙續尾，保羅勉勵 chiah-ê 作長執 ê 人，恁 ê 忠心，會得 tiòh 好名聲，ē-tàng 大膽論基督耶穌 ê 信仰。Mà ng 望兄弟姊妹 siōng-siōng 爲著咱所選出來 ê 長執代禱，hō 上帝 ê 靈 kap 恁同在。因爲恁 hō 咱 ê 教會成做主所祝福 ê 教會。